



Al jere une volte un frut che al viveve di bessôl intune cjase bessole sul canâl, a Ariis.
Al jere scjampât di cjase parcè che so pari e sô mari a bevevin e si barufavin.
Cuant che sô agne e jere muarte la cjase e jere restade vueide e lui, prime al veve puartât lis
cjanis di pescje, dopo al veve començât a durmî alì, e dopo nol jere lâf plui a scuele.
La robe e leve indenant di un an e so pari e sô mari e jerin muarts cence nancje cirîlu.
Intant... doi fantaçats “dai agns Sessante” e torzeonavin in vespa di chês bandis là.
Par afârs.
A vevin cjavei cul çuf e gjubots di siôrs.
A jerin i sansârs de Monte di Precudie, a Cjasteòns.
Il frut al va indilunc a vivi platât in te cjase dongje il canâl.
Al à let une storie sul pesce palla, e di chel moment il pinsîr no lu mole. Nol va a scuele di
spes di tant e no si fâs plui viodi dai soi compagns, al passe il timp a pescjà tal canâl,
sumiant di cjatâ il pesce palla.

Par mangjâ al robe lat in tes stalis e salamps in tes cantinis.
Une gnot frede e limpide di Març i doi sansârs a tornin dal plui biel afâr de lôr vite.
A vôsin e cjantin par dut il stradon di Codroip e dopo a van jù par Sant Andrât, pedeant cul
lis vespa par dute la basse. Corint come sfolmenâts.
Cuant che son fûr di Sant Andrât un di lôr si imberdee in curve e al va jù, dret... tunf!
Un salt tal canâl.
Le vespa e reste a mieze strade, sgreseant e cimiant cul fanâl dut spaurît.
A pene che al tire fûr il cjâf da la aghe il moro al torne a ridi, come un basoâl, cjoc in bale.
Chel aaltri al ferme, al torne indaûr serio e... si met a sgatarâ a pene che lu viôt vîf.
E tachìn a sberghelâsi:.. tire... mole... sburte! Cuntun toc di vencjar si tirin sù, e tirin sù la
vespa e a tornin a partî come sfolmenâts.
A son doi dîs che il frut no si jeve dal jet. Al à la fiére. Ma cumò si è sveât cuntune fan!
I à restât dome un vâs di sardelis che al à cjatât su le vetrine, cjase di so pari.
Cuant che al è tornât a cjoli dut ce c'al podeve puartà. Ma di gnot, cussì no lu à viodût
nissùn.
Al vierç il vâs, al cerce... puah! Ce schifo! Fraidis patochis!
Une ore dopo al è sul canâl di sot, daûr de vile, che al pescje.
E je matine adore di un mês di Març, frêt che al taie la muse e soreli.
Lui, in manîs di cjamese, al treme dut. Bessôl, in pîts tal mieç des cjanis, sul ôr dal canâl.
Al à le fiére alte, al çavarie, nol capìs une madone...
Come intun sium, di colp al tire sù le cjane e lu viôt! Lu viôt!
E lu fâs colâ. E al cole ancje lui ma il pantan glaçât tal cûl lu fâs jevâ sù come un razzo.
Al tache a fâ sù il fîl e al tire a rive su lis cjanis dongje di sé... il Pesce Palla!
Di li, no si vise nie. A pene tornât al cole sul jet e si svee dopo tant timp dut sudât, strac.
Al jeve sù, tramant come une blede e al va sul seglâr a bevi un cop di aghe.
E lu cjate!... A-lì! Sul seglâr!
Sua Maestà Il Pesce Palla: S.M.I.P.P.
Smipp al veve bisugne di curis, alore il frut al va te stale di Guerino a molzi, al bêt un got di
lat, si sinte un moment tal soreli par scjaldâsi e dopo si met a fâ... chel che al à di fâ.
Dut ben. Il Pesce Palla, sujât, al jere grues cussì.

Al podeve cjoli propit dut, cumò. Ma, prime di dut...un biliet di treno!
Par lâ vie par simpri, par simpri!... Di chel paisàt alì. Il so.

di Leonora

#173